

لسه المشاوير ...

لسه المشاوير

(شعر بالعامية المصرية)

بهي الدين عبداللطيف

اسم الكتاب : له المشاوير

اسم المؤلف : بهي الدين عبداللطيف

النوع : شعر عامية

رقم الإيداع : ٢٠١٩ / ٨٦٤٤

الترقيم الدولي : 978 - 977 - 85453 - 7 - 1

المراجعة اللغوية : صمدى عبدالرازق

الإخراج الداخلي : فتحي عبدالرب
وتصميم الغلاف

المدير العام : نورا جويدة

المستشار العام : محمد جاديش

مدير النشر : أحمد عبد الجواد



فؤاد مسند ضيفنا إلى الأئمة

بيت الشعر العربي

رئيس مجلس الإدارة : سهيل بن عبد الكريم

الإهداء

* * * * *

إلى عمرى اللى عَدَّى !

أنا مش زعلان منك

ولا عندى عتاب

وإن كنت ها قول غير كده

كذاب

بس انت سامحنى

ونبقى احباب

أنا فرحان

خرجت في أول الرحلة

بدون عنوان

بدون دعوة ولا استئذان

خرجت في صورة الإنسان

واحنا من قديم العهد

ومن ميراثنا لجدودنا

نلاقى الأم تزربنا

وتحدفنا على الكتّاب

نلاقى الفلكة والزخمة

وفظ ما عندهوش رحمة

يعذبنا بدون أسباب

لأجل أن نحفظ القرآن

عشان نبعد عن السرحان

ولما حفظت أنا الفاتحة

مع التوحيد

وبعدها حصة التجويد

لقيتني باتولد ثاني

بشكل جديد

لقيتني باعشق التجويد

وباhtزهز مع التريد

لقيتني باعشق الألحان

عرفت إن أنا فنان

ومن يومها وأنا فرحان

عشان فنان

أنا فرحان عشان مازلت باتنفس

ومتحمس لذكر الله

وراضى بأى شيء كائن

وراضى بأى شيء ها يكون

ورامى حمولى ع الرحمن

وإفرض إن من بختى أكون فقري

وإفرض إن مكتوب لى أموت فقري

راح أحزن ليه ؟ !

وأرفض ليه ؟ !

أنا فرحان ومتفائل

وأحياناً باكون عاقل

صحيح عاقل على باتتجان

لكن فرحان

سمعت الصبح ست الحسن بتغنى

وهى بتغسل المواعين

وبتدندن نغم شامى

لقيتنى بسرعة

باحط صوابعى فى ودانى

كأنى باسمع الشياطين

وبأعمل زى ما اتعودت

بقى لى سنين

ولكن حاجة ومش منى

قالت لإيدى استنى

ورحت أسمع وأتصنت

معاها سرحت

لقيتنى كنت ظالمها

واعمى عن معالمها

لقيتنى بأقول لها تانى

يا ريت تانى

عظيمة يا ست

لمحت عزيزه بتعدى شارع عشرة

وشايله فى إيدها فحل كرمب

وأصبح حجمها عشرة

وساحبه وراها سرب عيال
حمدت ربنا فى الحال
حمدته بامتنان من القلب
عزيزة كانت الفرحة
وأول حب
وكانت فى الجمال عشرة على عشرة
وكان صوتها ولا الكروان
عزيزة ابتدت ويايا بالهجران
وهى كانت الفاتحة على الأحزان
ودى الوقت أنا فرحان
لأنه ابتدا صوتها ياخذ خنфан
وأنا بأكره قوى الخنfan
حمدت ربنا جداً على الهجران
وعلى الحرمان ما نيش ندمان

اشطب عليه

ضيف جديد

شايلىنه ناس على وشهم

تعب الطريق

طالبين له إذن بالدخول

باين عليه عابر سبيل

الأولى نرجع للأصول

وان حتى كان عابر سبيل

اسأل وقل لى

هما مين

بيقولوا اخوك

وابوه أبوك

أخويا مين ؟

اوصف لى شكله وهيئته

اللؤم طافح على الكفن

وريحته ناكر للجميل

ميت ولكن من زمن

اثناء وجوده فى الحياة

اشطب عليه

تربتنا مشى ناقصه العفن

والكارهين دفع الثمن

جاي لنا ليه ؟

ما فتحش بيته للقرايب

والصحاب

ما فتحش قلبه

غير لمكروب الأنا

ماحاولش يصلح مرة بين أخ وأخوه

وبقلب مجرم راح يحاسب طبع ابوه

واتدارى فى زى الحكيم

قولوا له روح اطلب سماح

من اللى خلق

وبلاش قلق

قولوا له سيبيه مننا

العفو صنعة ربنا

تسقط هي

ها تسبح للمولى وتدعى
ودعائك زى العادة يخيب
ويارب الناس اجعلنى امير
على شعب مؤدب
ومسالم
ما يكونش فقير
واوهبنا يارب ميدان وكبير
لاجل الجماهير
تخرج تهتف
وتمارس حقها فى التعبير
يسقط عصر الزوجة الواحدة
وبنشجب تحرير المرأة

خيالات

شبيك لبيك

اطلب تجاب

فنطرت له يا عجاب

هات لى بسرعة صرتين من مال

وعروسة أحلى من الخيال

مالهاش فى مواضيع النكد

وشقة فى وسط البلد

واسعة تناسبنى

قال لى انت ليه قاصد تعذبنى؟

شقة فى وسط البلد مافيش
دى الدنيا نار
والبركة فى اللى ولَّع الأسعار
ممکن أجيب لك
شقة فول وطعمية
أما البنات وده مية فى المية
ما بيعرفوش حاضر
وفيه أمور اتغيرت
وأمر هتتغير
فلقيتني متحير
عفريت وعاجز يجيب لنا الطلبات
يبقى احنا لازم
نبطل الخيالات

غاب عنى

مرت سنة

لاحد زارنى أو افكرنى بالدعا

غير بس بنت صغيرة

كتبت فى كراسة الحساب

زى النهارده جده غاب

لو كان زميل فى المدرسة

كان من الاكيد كتبوه غياب

وقالوا له هات والدك معاك

وعم حسنين المؤذب ع الدوام

من غير سبب

زار الترب

وقف ينادى الميتين

بصوت حزين

وكأنه كان مستنى رد

فشعرت انه وحيد بجد

كان نفسى اقول له بابتسامة

ما تيجى تتفضل معانا

بهجة

النهارده صحيت لقيتنى باشوف كويس

وقادر اسمع

والنفس مرتاح فى صدرى

ما اتسندتش ع الحيطان

ونزلت السلم أجرى ...

الله اكبر

هو انا هارجع لأيام الشباب

ولا صحوة الموت اللى قالوا الحكماء عنها

ولا حب بينغبش فى قلبى !؟

شئ يحير

طب وليه حاسس بانى بقيت سعيد

فاكتشفت

لما صابنى الاندهاش

ان كل الفرحة دى

لاجل ها صرف المعاش

ليه يا ابن الناس ؟!

على غفلة أخذنى بعنف فى حضنه

والشارع هاص

والدنيا اتبدرت ناس

واتطوع واحد قال فى شهادته قصيدة شعر

نجاها من السواق الأعمى

فى آخر لحظة

نجاها الله يسترها معاه

وشعرت بجسمى واجعنى

وعملت رصيف الشارع كرسى قعدت عليه

وبكيت وبحرقة

يمكن من الفرحة

لإنى ها عيش من تانى

أو كان الحزن مازال بيهز كيانى ؟!

مش عارفه ...

لكن ... الله لا يسامحك

صحيت عفاريت

أنا كنت خلاص ارتحت لنومها

وردت عليها

لا هاسامحك

ولا هانسى ملامحك

عتاب

كل يوم يسألني عنهم

والسؤال نفس السؤال

واما يوجعني العتاب

راح أقول لنفسي

ياريته يسكت

هو أنا فاضى اشوف طلبك

وطلبات العيال

لو صحيح عايز تشوفهم

تعالى شوفهم

واما احياناً يقول لى

انت محتاج يا ابنى حاجة

اقعد اضحك

وانت حيلتك اى حاجة

روح ونام

النهارده والمزاج ما بقاش تمام

صاحبى قال لى زور ابوك

ده اشتكى منك

لطوب الارض

ولكل المعارف

ليه يا ابويا

ما انت عارف

شغلى واخذ كل وقتى

هو ده رزقى وبختى

وانت راجل

واهتمامك فى اللى فات

واحنا غيرك

اهتمامنا فى الله جاي

انت مش ممكن هترضى تعيش معايا

روح وشوف لك دار رعاية

تلقى ناس زيك فى سنك

يا خدوا حسك

وانت كنت زمان عظيم

صيت وجاه

ايه اللي عاوزه تاخده تانى

من الحياة ؟!

مش بالومك

بس منعاً للمشاكل

لما تقصد تشكينى

ابقى تختار شخص عاقل

خطافة

عيب نتكلم كده على الباب

ادخل نشرب فنجان قهوة

احنا اكيد راح نبقى اصحاب

قبل ما ينطق ساب لها ايده

واما خياله قام يتحرك

لاجل يعيش أحداث الفيلم

دخلت زوجته عليه المكتب

خطفت من قدامه الحلم

مش بایدی

لو كان في ایدی الاختیار

انا كنت اختار

زمن خلاف زمني

وام غیر امی

واب تانی ما یشتكیش منها

ویجیب سبع اولاد وبنت

ولا زوجه تدبحنی

کل یوم بالرضا والصبر

لو كان بایدی كنت

ارفض أى شئ عشته

حتى النجاح .. والصحاب الطيبين

وانتظار ساعى البريد

يمكن يطمنى

والحلم الاهبل الى جننى

انا كنت ارفض كل شئ

الا السجود لله

وحبى للمشارع الى اتولدت فيه

مش ناقصاك

ما تا كلش الفرخة لوحك

من فضلك سيب الورك

وما تطمعش فى كل الصدر

وان امكن حنة من الكبد

واتخلص من داء الكبر

وتعالى وخط على بابى

بس نصيحة عليك بالصبر

علشان انا مش ناوى افتح لك

وها سيبك ملطوع على الباب

واعمل إني أنا ما نيش محتاج
وافرح وأنا عمال اتأنزح
رغم ان أنا مش لاقى الفجل
ومن الجايز فجأة اتعصب
واتعازم واديك بالرجل
فعشان ربك يرضى عليك
قوم بوس إيدى
وان شفتنى قاعد بالأطه
وشى لفوق
حط الشنطة بكل هدوء
على الترابيزه العرجة هناك
وتورينى عرض كتافك
مش ناقصاك

معها حق

قالت لى رَجَّع الخضار

قلت لها مش ها قدر

شان الجو نار

والدنيا صيف

والبياعين بيقولوا عنى

كلام سخيف

أهو ده الافندى المحترم

اللى مراته بكل حاجة ترجعه

ويشبعونى تريقه

ولاني رافض للنقار

رجعت كالعادة الخضار

والبيت مهواش للصحاب

ومش ها نصف من وراهم الهباب

وبلاش قرايبك الندامة الفلاحين

عشان جزمهم فيها طين

ولا البراغيت اللي اكثر من الهموم

مش عاوزة تطلع من الهدوم

ونزلت ليه؟

وكنت فين؟

والحاجة عيشة عاوزة ايه؟

انا شفتها بتكلمك

وعم إدريس والجماعة البوابين

قاعدين وراصين الدكك

وفى انتظارك حضرتك

ونسيت يا بيه ان انت بيه

هو انت ناوي تشلنى!؟

ليه الماهيه جايه ناقصة كام جنيه

شممنى بقك

كنت سهران ويا مين؟

وضحكت والشاى اندلق

عيش بمزاجك

اعشق ذاتك ..

شكلك ..

رأيك

متع نظرك .. سمعك .. لمسك

دوق واتلذذ

واتكبر على الناس واتعزز

فانت الأجمل

وانت الأخطر

قول ما بدا لك

صَحِّ خيالك

دوس على اى حقيقة وفوت

لكن اوعى تصحى ضميرك

احسن ياخذك بالشلوت

حق العشرة

ييعشَقُ التدخين

ويراعى حق العشرة والصحبة

اللى بقى لها سنين

والود اللى كان ما بيقطعوش

إلا نهار رمضان

وبيوصل ما بين السجارة

والسجارة بسجارتين

ويقولى بلسان الحكيم

بتريح الأعصاب

وبتدى طعم للقهوة

وبتوهوج الفكر ساعة نزول الشعر

وبتخلينى أستحمل رزالة الست

وبيعترف أن له أفضال

بتصاحب الكمسرى

وتهرب من الأجرة بسيجارة

ويصاحب السجان جوه اللومان بسيجارة

ويصاحب الكهان فى الكنيسة والجامع

وبوعد منهم تدخل الجنة

بيعشق التدخين

ويوصف الناس

اللى قدرت تمتع بالخيانة

ويغيط مراته بضرتها

كل وقت وحين

وناوى من السنة الجاية

يتصاحب مع متعة الشيشة

ويتدلع مع الاتنين

موجوع

اتمسح فيه
واتقرب منه
وانزل له لآخر درجة
فى سلم سنه
وأحاول أضمه
يجرى ويتدارى فى أمه
واقول له أنا جده
يمنعنى أبوسه فى خده
وعشان زيارات الابن قليلة
انا جده قليل الحيلة
واحلم بيبوس على ايدى
كما كنت زمان مع سيدى

تركة

هاتبيع سريرك والدولاب

وتشحت البدلة القديمة والجديدة

وكأنها بتعمل ثواب

أما الكنوز اللى انت دافع فيها دم قلبك

اللى مبهدله بيتها

وعاملة منها ضررتها

هتبيعها للى يجهلك

ويدفع أقل

اصحابك العايشين فى حزن مكتبتك

الأصدقاء الأوفياء

كنت لما تمد ايدك

عشان تاخذ كتاب

تقرا لهم الفاتحة

وتكثر من الدعا ليهم والسلام

حتى الكتاب اللي انت أخذت بيه الجائزة

مصيره يوصل لبياعين اللب

ويروح فطيس

يا حسرتك

ويا خسارتك

هتبيع تاريخك

وتقول لروحها..

كان ابن مجنونة

انا اللى لبسته

ونصفته

وعملت له قيمة

يكفيك يا شاعر

انك تعيش فى مكتبة غيرك

ساعة يمد ايده

يقرا لك الفاتحة

يقف قصاڊك انتباه

ويوهبك قبلة حياة

مشاهد

الفيلم بايخ وفاشل ومتكرر

والسيناريو ضعيف

البهجة مش موجودة ألا في مشهدين اثنين

يوم الخطوبة طقوا زغروتين

ويوم لما دفعت المهر

فاكر كلام امها

دا احنا نجيبها لكم جارية وخدمة

فاكر كلام امك

البنت هادية وطيبة وكأنها من الريف

فاكر أغاني الفرح
(يا حلو قل لي على طبعك وأنا امشى عليه)
طبعاً بقية الحكاية انتوا عايشينها
الاب يطلع مش شريف
وامها المؤمنة مجنونة بالتخاريف
وانت اللي تبقى
الجارية والخدام
خلص الكلام
لكن اللي باقى قبل كلمة End
صاحبك يزورك فى حلمك
كل يوم بالعند
وقعت يا مغفل
ما أنا قلت فى المبتدأ
الفيلم بايخ وفاشل ومتكرر
والسيناريو ضعيف

كسل

ستات كتير

ما يتنسوش

البعض شفته من بعيد

وشوية منهم معرفة

والباقي حب من اللى كان

يقلب نكد

ويخلى وقتى مش سعيد

شياطين بتتنطط فى وشى على الدوام

ملكات جمال بتزورنى فى الأحلام

دايما عيونهم ساحرة

والنظرة منهم مأكرة

ودمهم زى العسل

كان نفسى أملكهم جميعاً

كلهم

لولا الكسل

عاش بالسكته

قالوا بعد الكشف عليه

مات بالسكته

وقال حلاق الصحة

عن والديه

نفس السكته

قال الجار الساكن نفس الحجرة معاه

ما لهوش صوت

عاش العمر فى حاله صموت

بحر سكوت

واتذكرتك يا با ساعتها

واتذكرت اعمامى الستة

عائش جنب ضفاف النيل

يزرع بس اللى يكفيه

وينام تحت كفوف رجليه

يعرف أصل فنون النكتة

عمره ما خالف أمر السلطة

قالوا عليه

مات بالسكتة

لكن نسيوا يضيفوا عبارة

عاش بالسكتة

إنسان

الذكريات مكسوفة منى

من خزيها بتدارى عنى

وأما أسألها عن بعض الحاجات

تسكت وما تردش

فاكر البيت القديم

والجيران والاهل عننا نايمين

واللعب ويا البنات عروسه وعريس ..

مين اللى عرفك ابليس

وانت لسه ما طلعتش من البيضة

مين اللي ذلك على الكذب المساوى ؟!

والجراة على القرآن

ساعة الحلفان ؟!

أول جنيه سرقتة من محفظة ابوك

اول سيجارة ملفوفة من دولاب عمك

الخاتم اللي طلع فالصو من مصاغ امك

والقعاد على القهاوى

والنبش فى الاسرار

فضيحة الأشعار اللي نشرتها باسمك

جوابات اخوك

كنت تقراها قبل ما توصلها لحبيبتة

اختك الكبيرة

والسبب الحقيقى لطلاقها

والفرجة ع النسوان من ورا البيبان

بيعملوا حلاوة

مين اللى علمك الشقاوة ؟!

الذكريات واقفه زى الشوكه فى حلقى

ومضيقه خُلقي

يا هلترى مين اللى يكسب الرهان

آدم الإنسان ولا الشيطان

يا متعتك ويا سعدك يا ضعيف الذاكرة

مبروك عليك نعمة النسيان

أنا باحسدك

حلو ويتعاشر

راحت فلوسك يا بطل

مبروك عليك

حريتك وخروجك الميمون

من مصيدة عد الفلوس

كسبت كام وخسرت كام

ياما كان فى نفسك تعيش عصفور

سايب جناحه للسما

وبالرضا مستور

يا متعتك وانت بتستنى الرزق

من سيدك يوم بيوم

والدعاء المستجاب لما باب يتقفل

ويتفتح لك ألف باب

آن الأوان انى اعترف

إن الفقر يتعاشر

صنف ابن كلب يسحرك

من نظرة واحدة يبرجلك

فتعشقه ..

لىّ معاه ذكريات

وشوية حاجات

بتخلينى أموت من الضحك

باتغطى بيه فى ليالى البرد

والصيف بيتحول فى إيدى مروحة

لو رحت ترسم من الخيال صورة جحا

هيبقى شكله بالتمام

اعطانى من علمه الغزير فن الحيل

أطاطى امتى؟ وامتى امثل اكون كبير

وسقانى سر الأقنعة

فلو هدومى مقطعة

اظهر كما فنان بيعشق الموضة

راحت همومك يا بطل

محتاج أدب

سألنى صاحبي العبقري

لو جالك الموت يحضنك راح تعمل إيه؟

فكرت اقوم أخرم عينيه

عشان ساعتها كنت باكل جمبرى

النص كيلو كنت جايبه بمية جنيه

لكن هدانى ربنا رديت عليه

راح اقول له اتفضل معايا وبالهنا

واستأذنه لو كنت أصلى ركعتين

قام قال : وبعد الركعتين ..

طبعاً غضبت

ورميت غداى للكلاب

ما لنا ومال الموت وسيرته يا عم زفت

صديت لى نفسى الله يجازى اللى اشتراك

فى الضهر من سوق الحمير

هو أحنا لسه شبعنا من أم الحياة

ده انا حاسس انى يا دوب

ما عشتش غير يومين

ولقتنى لسه فى مصيده هذا السؤال :

كنت اعمل ايه؟

كنت استخبى منه فى دولاب الهدوم

أو كنت ازوغ تحت السرير

يمكن ساعتها حضرته يكتب كلام:

العبد ده محتاج أدب فلفص وحاول الهرب

جرى مننا وسط الثرب

مهبوش

سألت الشعرا فين درویش ؟

قالوا بيولد ...

صرخت وقلت يا ستار

خبر اسود

بيولد زی اخواتنا من الستات

وبطنه تفور وتتکور وتتدور

ولما يبقى فی السابغ يثيل الهم

ويصحى جوه وجدانه حنان الأم

وجه فی خيالى عيد ابنه

هيمشى ازای فی الشارع

ويستحمل كلام الناس

ده غير اصحابه فی الجامع

فضيحة وبهذلة سمعة

خصوصاً لما سيدنا يذيعها

فی الجمعة

وناس ها تقول لهذا الطفل

ابن سفاح

ومين يا هلترى السفاح

وناس تانيه ده موته حلال

ولكن فجأة واحد قال

جرى لكم إيه

أخونا وعمنا المهبوش بيولد شعر

جرالكم ايه بلاش من ظنكم السيء

مداعبة

درويش السيد على التليفون

قلنا له وقال : صحوه من النوم

مرحب يا أبو عيد طلباتك ايه

قام قال من غير ما نزيد ونعيد

احمد تعبان .. كلمنا مراته واولاده

فقالوا لنا مريض

اثناء الكشف عليه رفضوه

وقالوا لهم مش نافع تانى

وكمنا من الصعب ان يفكوه

علشان مسكين مالهوش كتالوج

وان حبوا يرجعوا أجزاءه

صعب يلموه

وانا قلت يا عم الرب كبير

والطب اتقدم يا ابو درويش

قال لى انت اتنيل وما تفتيش

امبارح شفته وانا فايت

حاطينه مع الاكل البايث

قدام البيت

والقطط التايهة المسكينة

بعد ما شموه

ما رضوش ياكلوه

أشوفك السنة الجاية

اكيد كان ماشى فى وسط البلد

زهقان ومتكدر

انا قلت له على فين

تعالى نشرب شاي

قام قال لى مش ها اقدر

ممكن اشوفك السنة الجاية

فقلت له اصبر تعالى اقعد

قال لى نقعد فين ؟!

والنهار احمر

والناس بتنفخ فى وشى

وشكلى مش عاجب

وبطل قلة حيا

والنسا بلابيص ...

يا عم انا مروّح

يا عما حاسب انت السيد الأستاذ

علمت الشعرا وغير الشعرا سهر الليل

علمت حتى الحطب يكتب المواويل

خليت زمار الحى يزمر

ويعتّق فى الأنغام ويخمر

خيت السامع يسكر

يا عما امشى

ولكن بس على مهلك

ده الناس بدون الحر تهلك

قال لى كلامك كتير

وتعبتنى بجهلك

على فكرة واحدة فى الشباك بتنده لك

اشوفك السنة الجاية

وهم ومستحيل

ايوه عارف

إن أنا من سن أبوك

وانت بالنسبة لى وهم ومستحيل

بس انا وده طبع فرّ

باعشق الوهم الجميل

والسفر جوة الخرافة

بدون حساب

واحنا لو فى بلدنا

فرصة انتخاب

كان اكيد ها يتوجوكِ

وتبقى ملكة

وابقى واحد من الرعية

والقضية يا حياتى

إن أنا محتاج لواحدة

غير مراتى

لاجل أكتب أغنياتى

واعذرينى لما أقول لك

لما تحتاجى تنادينى

ابقى قولى

اسمى حاف

اوعى مره تقولى عمو ولا جدّه

خرجيني من سني

وانشليني م الجفاف

واسمحي لي لما اشوفك أبتسم لك

وانحني للسحر

والفتنة اللى طالة

وصدقيني لما احلف لك

بعم الشيخ عطا الله

انتِ أحلى من نجوم السما

فى أفلام أميركا

وانتِ أطيب ريحة

من كل الورود

انتِ انعم عشرة

من زوجات أبويا

ده احنا على أيماننا كانت

النسا شكل الرجال

والجمال كان فى اكتتاب

وانتِ نفسك تشهدى

قد إيه كان العذاب

طلعى الصور القديمة م الدولاب

وانظريها

شوفى ماماتك

شوفى خالتك

شوفى كل الجيل بحاله

من عموم السيدات

كلهم مشروع عاهات

حتى كتاب الأغاني

أيامها كدابين

وان يكون صدمك كلامي

اعذريني

اصل انا في الشعر

واحد من الهمج

فوضوى ما عرفش أبويا

بانقل التعبير بعبله

في الكتابة لسانى أقرع

انت أبوك كان عظيم

جنبه يهبط سهم خفرع

بأهراماته

يكفى أنك تحفة غالية

من عظام انشاءته

وابداعاته

ربنا يرحم ابوك

وانت لو هيخبروك

تبقى جنبى

لابسة أزياء العروسة

ولا تختارى العنوسة

دوغرى تختارى العنوسة

بس انا فى الراى عكسك

نفسى ارجع تانى عيل

اطلبك فى كل ساعه

وانتِ طبعاً تطلبينى

وتبقى هيصه لما مرة تعزمينى

عند حاتى

بعدها ناخذ جيلاتى

واعترف لك يا حياتى

يا زعيمة ملهماتى

انتِ فعلاً حاجه تانية

غير مراتى

وفى جمالك

أقدر أكتب أغنياتى

شوية عضم

لا شعرت يومها بوجع

ولا قلبى حس بخوف

وكان شكة أبرة

وخلصنا

وآدى اللى كنا مرعوبين منه

انتهى وانزاح

مش باقى غير صوت النواح

وسؤال سماح

عن الفلوس

بابا شايها فين

والولاد الاتنين

دخلوا فى سباق النبش

والتفتيش

وانا اللي كنت الهيبة والسلطان

أصبحت كان

وشيء كانه ما فيش

يا هلترى أم العيال

راح اشوفها من تانى

والأقيها فاكرانى

واحكى لها ع اللي جرى

ونكران الجميل ...

ومحنة اللى يعيش

مع جيل خلاف الجيل

ولا اللى باقى منها ذكرى

وجمجة فاضية

وكيس قديم اتهرى

لامم شوية عضم

يا هلترى باحلم

ولا احنا جانا الفرج

من عنده سبحانه ؟!

آخر الخط

وكأنى فى قارب وسط محيط

وما فيش مجداف ولا شئ يتشاف

غير الوشين

السما والبحر

والليل مجنون

بيلف الكون

وبيرسم على وش الدنيا

حبة شخابيط

فصرخت وقلت النجدة يا خلق

اتحاش الصوت فى الحلق
كوابيس وغيوم واشباح
وحلاوة روح عماله تنوح
انا مش هاتنازل واستسلم
فطلبت خيالى وقلت له قوم
ارسم لنا شط
أو ارسم شئ ينفع قشة
أو حتى سراب
قال مش بإيدى أكون رسام
انا بس خيال
والقارب مال
وانشال وانحط
قال احنا وصلنا
لآخر الخط

ببساطة

أختك المسحوبة دائما

من لسانها

هى أسباب المشاكل

هى كانت جايه ليه ؟

وانت مالك ؟

إيه جرى لك ؟

واحد جايه تزور اخوها تمنعها ؟!

والكلام اللى احنا مش لازم نقوله

قلنا منه كثير كثير

قول قضينا الليل بطوله
فى الخصام
واتسامحنا واتصالحنا
واكتشفنا
لما جانا العمر يعلن منتهاه
إن دى هى الحياة
هو ده الملح اللى كان علشان نعيش
واما رحت سألت واحد من بلاد
برة وخواجة
قال لى طبق الأصل هى دى حياتنا
هى هى
ده تراث الانسانية
من بساطة الإجابة
لقيتنى باضحك

عندك رصيد ؟

الموت حنون ...

هيبغافل الحراس

ويفتح الزنزانة ليك

ويقول لك اهرب

هيريحك من ناس

عليك ليهم ديون

لابسين هدمم الافتخار

وبينظروا لك باحتقار

مع انهم زيك عبيد

انفد بجلدك من الجنون

لمكان لا يمكن فيه تهون

يتساوى فيه شخص الملك والشحاتين

مع ارباب السجون

الموت كرامة للى زيك

هتلاقى ويا الأبرياء

حریتك

وتعيش سعيد

يا هلترى عارف مسالك سكتك

ولجنتك عندك رصيد!؟

باقى فرقة كعب

ومين قاعد هناك وحده ؟

وحاطط إيده على خده ؟

مين واقف

على حرف الحياة

وزمانه بيعانده ؟

معقولة هو انت

وانت اللي كنت انت

سيد الدار

وعليك مهابة ووقار

يتمنوا ليك الرضا ترضى
يا محنة اللي يطول عمره
ويعيش غريب
فى جيل خلاف جيله
قلنا زمان إن اللي باقى فركة كعب
خمسين سنة
ولسه الفركة فى صباها
كل التعب والشقا فى المية سنة الأولى
مين اللي يقدر
يعدينا من المحنة ؟!
فين الشجاع النبيل
يدى الحصان

رصاصه الرحمة

إزاي رضيت تعيش مغلوب

وقلعت تاج الإمارة

ولبست توب المرجلة مقلوب

يا مية خسارة

يا هلترى سمعوك اللى انا سمعته

يقعد لنا على جنب

مش ناقصة غلب

على إيه بيتأنزح

إن كان صحيح

أنكروا فضلك

تعالى من فضلك

ومن سكات

نمئل إنا أموات

وبدال ما نجبر المكسور

نكفى على الخيبة ماجور

قهوه سادة

كأنى بجد أنا عايش

وباعدى الشارع

واصحابى بتوع الجامع

بينادوا علىّ

وانا عامل قال مش سامع

وقعدت فى وسط الناس

وسمعت المقرئ

وشربت القهوه السادة

وبحكم العادة

رجعت البيت

وطلعت لحد الدور الرابع

ولأنى نسيت

فرجعت نزلت دورين

وسؤال مسعود

فى ودانى يزن :

أنا فين ؟

يا صحابى واهلى انا فين؟

وطريق الجنة

اروح له منين

يلاوعنى الظن

يا عباد الله

محتاج لدليل

يا عباد الله

انا راجل كُهْنَة كبير السن

واسمع أصوات

ميتة من الضحك

ما لهاش أشكال

وآنست يا خال

يا كبير السن

باحب الكذب

باحب الكذب

لأنه أصيل

ما فيش مره قصدته

طالب النجدة

وزاغ منى

كفايه انه حولنى فى وقت الأزمة

من مجرم لشخص نبيل

عرفته فى أول المشوار

فكان مكسب وفاتحة خير

سقانى المكر والحيلة

وعرفنى إيه التمثيل

علمنى كثير ألعاب

ومن يومها واحنا اصحاب

بأحب الكذب

لأنه الشافى من الآلام

بيقطب صفحة الواقع

ويفتح شاشة الأوهام

بيخلينى أحب انام ..

وأدخل عالم الأحلام

ومهما اتمنى يدينى

والاقى حبيبتي جاية لى

بتتأسف

وبتوطى تبوس أيدى

ومش قادره اعيش لحظة

بعيد عنك

وأتمنى اكون جارية وخدمة

ونتعائب ونتحاسب ...

قدرتى تقطعى الجوابات

وترمى شبكتى فى وشى

وجالك قلب تقوليها :

انا كارهاك ...

تقول لى هزار

ده انا باهواك

واسامحها

يا أهل الله

قولى لى انها ع الباب

بتستأذن

ولو باكدب

يا أهل الطب

أنا علاجى فى حقنة كذب

وحدى

أنا وحدى ... وجدّه هناك

قاعد يقرا

ونضارته عيونها إزاز

وماما وبابا راحوا الشغل

وتيتا واقفة فى الصورة

تبص علىّ م البرواز

ما فيش قدامى غير اللف والدوران

من الحيطه وللحيطه

واقول زهقان

ونفسى أولع البوتجاز

لكن خايف من الكبريت

عشان جواه أكيد عفريت

ورحت أكلم العصافير

لقيتها عبيطة

ما تعرفش تتكلم

كمان مش ناوية تتعلم

وجده زيههم ساكت

يا رب يا رب خلينى قوام اكبر

كرهت السجن

كرهت الحيطه والعصافير

وتيتا القاعدة

ما بتعمل ولا حاجة

وشخص غريب

قاعد يقرا

ونضارته عيونها إزاز

يبص علىّ باشمئزاز

ما حبت هوش

ولكن برضه ما باكر هوش

كان من نفسى

ولما الدنيا إدت ضهرها لىّ

وبان لى منها سوء القصد والنية

وحجبت عنى بهجتها

وظهرت لىّ سواتها

وعم الغم ..

مسكت دماغى بإيدىّ

وقلت يارب

كريم انت

لطيف انت

وبىّ علیم

ومن غیرك یارب معین ..

وباسأل والسؤال طیب

مهواش رفض

واسأل وقت ما باسجد

وابوس الأرض

ولیه الرزق واخذنی

ونازل تحت

ولیه الحظ صادفنی

لجوه الفحت

وواكل فی النخاع منی

ونازل نحت

انا يارب مش تعبان

ده انا اتكسحت

أنا يارب نفسى يكون معايا فلوس

عشان أَصْرَفَ بحرية

وَأَكَلَ لحمة مشوية

واعيش بكرامتى بين الناس

عشان اصرف بدون ما احسبها

بالمليم وبالسحتوت

وأنسى الهم والتفكير

وأنسى البخل والتدبير

ويصبح لىَّ شكل وصوت

انا يارب نفسى يكون معايا فلوس

عشان ادى لكل فقير

يكون منحوس

وأدى للغلبة كمان

ولو ان الغلبة جاموس

ما يفرقشى معاهم شئ

ومين قال للغلبة نفوس

ده من أول طابور العيش

لظلم السلطة والتلطيش

وبكرة المستحيل واليأس

وهما ما فيش

وسبحان الذى أعطى

بدون حسابات

ولا مناسبة

ومش محتاج فى تدبيره

دفاتر أو آلات حاسبة

بيعطى الرزق للهاجع وللناجح

وللنايم على الصرصور

ومش محتاج لأى فلوس

عشان عدد الفقارى كتير

بعدد النمل والصراصير

هياخدوا كل ما أملك

ولا يكفيش

ولا عندى كنوز الأرض والسموات

مؤكد برضه ما يكفيش

وفى الآخر يحاكمونى كما سقراط

وبالاعدام يجازونى

وهات يا عياط

انا يارب مش محتاج ولا حاجة

وراضى بنعمة الإحباط

وبأقدر أغنى واحب

فاكر لما كنا زمان فى صباننا

زمان البراءة

زمان الترف

وكنت تقول لى بنبل وشرف بحب فلانه

وترجونى البس مسوح الكهانه

وتركع قصاى تقول يا أبانا جاى اعترف

واملس على شعرك اللى اتحل

بطيبة وحب

وانشد ساعتها قصيدة غزل

واقول لك بحرقة تحوش الخجل

تكلم يا كلب

يا ريت النهارده

تقولها لى انت

تكلم يا كلب

لإنى بحب

ومحتاج لقلب

يساع اللى عندى

وعندى الكثير

وقلبك كبير

انا يا صديقى فى حرب ومحبة

تصور اخوك العجوز العجوز بعمره اللى عندى

وقلبه اللى صدى ظهر له عواطف

بيقدر يحب

ويعرف يلاطف

تصور ضميرى

زبطنى فى مرة بأغنى

وقال ايه بأغنى

أغانى الغرام

وعرفت شفايفى

طريق الابتسام

وبأخذ خيالى فى حضنى وأنام

تصور بانى حضنت المدام

نسيت من ذهولى وحضنت المدام

برغم الكراهة وطولها ومداها

نسيت التاريخ والحروب والصدام

ضحك ببلاش

قال لي انت مش فاكِر خليل

تلميذ مدارس الأحد والملاك ميخائيل

كنا زمان بنقول مدارس عزرائيل

وكنت بتحب تنادينى باسمى الدلع علشان طويل

وشتما بعض

وحضنا بعض

وكان بنقول للشتيمة ترجع الحب القديم

فاكر حكاية عم سعد

لما سرقنا جزمته

ورجع يومها لبيته حافى

فاكر هجوم الفراشين بالمقشات السعف

عشان بنضرب الجرس

فاكر حسين وامه لما عضته وبركت عليه

واعضاءها بانت للى رايح واللى جاى

فاكر وفاكر

لكنى ما قدرتش ساعتها ..

عن خاله الاشقر اللى كان بيلمنا

وساعات يدخلنا كنيسة حينا

وعن ابوه اللى حافظ جزء عم

وجارنا أستاذ البيانو والفنون

اللى كان مجنون

ما سألتهوش حتى عن اخواته البنات

ولا أى حد

من الخوف يقول لى انه مات

فازعل بجد

لكن سألته ساعتها عن ام العيال

الى أنا ما شفتهاش وما عرفتهاش

وسألته أخبار النكد والعكننة

فقال كلام كأن انا هو

وهو كان انا

وقعدنا نضحك

ضحك يكفيننا سنة

السيرة الذاتية

- بهى الدين محمد عبد اللطيف
- ١٩٤٣/١٠/١٥
- الحالة :
- متزوج وراضى بالقسمة، وما عنديش حاجة أحكيها
- أعشق الكتابة عن الآخرين، أحلم بقلب شاعر، أبحث عن
البهجة ولا أبحث عن السعادة.
- العمر قصير ولا يكفى لأن أكتب تأملاتى.
- لا أكره أحداً وغير مسرف فى الحب.
- القراءة متعتى الأولى والأخيرة.
- ليس مهما أن يعرف الناس عنى شيئاً ، فأنا مهزوم ومأزوم
ومحدود وبسيط، وغيرى يكتب عنى أحسن منى.

الفهرس

٥	الإهداء
٧	أنا فرحان
١٣	اشتط عليه
١٦	تسقط هى
١٧	خىالات
١٩	غاب عنى
٢١	بهجة
٢٣	ليه يا ابن الناس ؟!
٢٥	عتاب
٢٩	خطافة
٣٠	مش بايدى
٣٢	مش ناقصاك
٣٤	معاها حق
٣٧	عيش بمزاجك
٣٨	حق العشرة
٤١	موجوع
٤٢	تركة
٤٥	مشاهد
٤٧	كسل
٤٩	عاش بالسكته
٥١	إنسان
٥٤	حلو ويتعاشر

٥٧	 محتاج أدب
٥٩	 مهبوش
٦١	 مداعبة
٦٣	 أشوفك السنة الجاية
٦٦	 وهم ومستحيل
٧٣	 شوية عضم
٧٦	 آخر الخط
٧٨	 ببساطة
٨٠	 عندك رصيد ؟
٨٢	 باقى فركة كعب
٨٦	 قهوه سادة
٨٩	 باحب الكذب
٩٣	 وحدى
٩٦	 كان من نفسى
١٠٢	 وبأقدر أغنى واحب
١٠٥	 ضحك ببلاش
١٠٨	 السيرة الذاتية
١٠٩	 الفهرس